

Sumáriu Kazu
Tribunál Judisiál Primeira Instánsia Baukau
Jullu 2025

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instánsia Baukau

1. Totál kazu ne'ebé JSMP monitoriza: 33

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	17
Artigu 154 KP no artigu 2, 3, 35 no 36 (LKVD)	Maus-tratus ba kónjuje	7
Artigu 145 Kódigu Penál (KP)	Ofensa ba integridade física simples	4
Artigu 2(nú.1(b), nú. 2(f)), artigu 20(nú.1)	Arma brankas	2
artigu 171 KP	Koasaun seksuál	1
artigu 178 KP	Aktu seksuál ho adolexente	1
Artigu 138 KP no Artigu 2(nú.1(b), nú. 2(f)), artigu 20(nú.1)	Omisídiu simples no arma brankas	1
Totál		33

2. Totál desizaun ne'ebé JSMP monitoriza: 27

Tipu desizaun	Artigu	Númeru
Suspensaun ba prizaun nia ezekusaun	68 KP	11
Pena multa	67 KP	15
Pena admoestasaun	82 KP	1
Totál		28

3. Totál kazu ne'ebé sei kontinua prosesu tuir JSMP nia monitorizasaun hamutuk: 5

B. Deskrisaun sumáriu julgamentu ba desizaun kazu sira

1. Krime maus-tratus ba kónjuje

Nú. Prosesu : 0068/24.VQSIC
Kompozisaun Tribunál : Koletivu
Juisa : Dra. Maria Solana da C. Fernandes, Dra.
Sribuana da Costa no Dra. Maria Modesta d. A.
Viera
Prokuradór : Dr. Julio da Silva Correia
Defeza : Dra. Agostinha de Oliveira
Desizaun : Pena prizaun tinan 2 suspende ba tinan 3

Iha 01 Jullu 2025, Tribunál Judisiál Primeira Instánsia Baukau, prezide leitura akordaun ba krime maus-tratus ba kónjuje ne'ebé envolve arguidu AdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 18 Jullu 2022, iha oras tuku 18:00 lokraik, arguidu rasta ofendida nia fuuk no riba ofendida ba rai, kontinua tuku dala haat iha matan parte karuk, tuku dala rua iha ibun no tuku dala ida iha inus rezulta ofendida lakon konsiensia. Kazu ne'e akontese tanba arguidu tolok ofendida nune'e ofendida hatan katak la bele tolok ninia inan-aman.

Maizumenus iha tinan 2018 nia laran, arguidu tuku dala barak iha ofendida nia hasan parte loos tanba tanba arguidu deskonfiaa ofendida ba mane seluk.

Antes ida-ne'e, maizumenus iha tinan 2017, arguidu tuku dala barak iha ofendida nia hasan parte loos no karuk, kazu ne'e akontese tanba sira nia oan tanis.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklara katak depoisde akontesementu ne'e ofendida ba tiha nia inan aman nia uma. Mezmu nune'e sira di'ak malu ona, no iha lia kulutura arguidu nian, ofendida kontinua partisipa. Arguidu deklara katak arrepende nia hahalok no foin primeiravés mai hatan iha tribunál.

Alende ne'e ofendida konfirma faktu hotu iha akuzasaun no deklara katak depoisde akontesementu ikus ofendida deside hela ho nia inan aman, no iha lia ruma ofendida nafatin partisipia no nafatin haree malu di'ak.

Alegasaun final

Prokurador haktuir katak arguidu nia aktu priense elementu hosi krime ne'ebé akuza ba arguidu, mezmua arguidu ho ofendida di'ak malu ona, maibé ofendida deside moris separa hosi arguidu, tanba arguidu sempre halo violénsia hasoru ofendida. Tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza haktuir katak bazeia ba produsaun prova arguidu konfesa, arrepende nia hahalok no foin primeiravés mai hatan iha tribunál, nune'e husu ba tribunal atu fó pena ne'ebé kmaan ba arguidu.

Desizaun

Depoisde avalia faktu hotu, tribunál konsidera faktu iha akuzasaun prokurador nian provadu, bazeia ba konfisaun arguidu nian no konfirma mós hosi ofendida katak arguidu ho ofendida di'ak malu ona no ofendida deside atu hela separa hosi arguidu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé asociadu ho krime ne'e, nune'e tribunál konklui prosesu ne'e no kondena arguidu ho pena prizaun tinan rua suspende ba tinan tolu.

2. Krime ofensa ba integridade física simples ho natureza VD

Nú. Prosesu	: 0012/25. BCBCV
Kompozisaun Tribunál	: Singulár
Juisa	: Dra. Albertina da Conceição das Neves
Prokuradora	: Dra. Remizia de Fátima da Silva
Defeza	: Dr. Grigorio M. L. de Lima
Desizaun	: Pena multa US\$40.00

Iha 01 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu JdSX hasoru nia feen, iha Munisípiu Baukau.

Akuzasaun Prokuradora

Prokuradora akuza katak iha 12 Janeiro 2025, iha oras tuku 06:00 dadeer, ofendida hadeer ko'ús sira nia oan ne'ebé tanis, maibé tanba ofendida atu ba tein labarik nia sasoro nune'e haruka arguidu atu ko'ús labarik. Antes ne'e, arguidu lakohi, maibé la kleur arguidu hadeer ko'ús fali labarik no ofendida kontinua tein sasoro to'o tasak. Bainhira ofendida fó han hela labarik no la'o ba mai iha arguidu nia kotuk derepente arguidu tebe dala ida iha ofendida nia kabaas parte loos. Ofendida ba halo tratamentu iha PRADET Baukau.

Prokuradora akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun, depoisde akontesementu família rua tuur hamutuk rezolve ona problema ne'e no sira di'ak malu ona, arrepende nia hahalok no depoisde akontesementu ne'e la baku ona ofendida to'o agora.

Alende ne'e, ofendida kontinua konfirma faktu hotu iha akuzasaun no deklar katak depoisde akontesementu ne'e família sira rezolve ona no sira di'ak malu ona no to'o agora arguidu la komete tan krime seluk hasoru ofendida.

Alegasaun final

Prokuradora haktuir katak bazeia ba produsaun ba prova arguidu konfesa faktu hotu iha akuzasaun, no ofendida konfirma akuzasaun katak arguidu provadu komete krime ofensa ba integridade física simples ho natureza VD hasoru ofendida nu'udar arguidu nia feen. Mezmu sira di'ak malu ona maibé husu ba tribunál nafatin kondena arguidu tuir hahalok ne'ebé nia halo hasoru ofendida.

Entretantu, defeza haktuir katak bazeia ba produsaun prova arguidu konfesa, di'ak malu ona, arrepende ninia hahalok, nune'e husu ba tribunál atu fó pena ne'ebé adekua ba arguidu.

Desizaun

Depoisde avalia faktu hotu, tribunál prova katak faktu hotu iha akuzasaun prokuradór nian provadu hotu bazeia ba konfisaun arguidu nian no konfirma mós hosi ofendida.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu 0,50 sentavus kada lora durante lora 80. Tribunál mós fiksa pena alternativa durante lora 53 prizaun, bainhira arguidu la kumpri pena multa refere.

3. Krime ofensa ba integridade física simples ho natureza VD

Nú. Prosesu	: 0003/25. VQWCB
Kompozisaun Tribunál	: Singulár
Juisa	: Dra. Maria Modesta d. A. Viera
Prokuradór	: Dr. Julio da Silva Correia
Defeza	: Dr. Grigorio M. L. de Lima
Desizaun	: Pena multa US\$40.00

Iha 02 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu SdC hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 16 Janeiro 2025, iha oras tuku 09:00 dadeer, arguidu tebe dala ida iha ofendida nia reen-toos, tuku dala ida iha kanuruk, tuku dala ida iha kotuk laran, tuku dala ida iha ulun, tuku dala ida iha kabun

no tebe dala ida iha kanotak. Antes ne'e, arguidu ho ofendida diskute malu tanba arguidu iha relasaun amante (selingkuh) ho feto seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrende nia hahalok, di'ak malu ona no foin primeiravés mai hatan iha tribunál.

Tribunál bazeia ba pedidu hosi prokuradór, presinde tiha ofendida nia deklarasaun tanba prokuradór konsidera faktu sufisiénte ona bazeia ba konfisaun arguidu nian. Iha parte seluk, defeza konkorda ho pedidu ne'e.

Alegasaun finál

Prokuradór haktuir katak haree ba deklarasaun arguidu nian ne'ebé konfirma ba faktu hotu iha akuzasaun, nune'e prokuradór konsidera arguidu nia aktu ne'e priense krime ofensa ba integridade fízika simples ho natureza VD ne'ebé akuza kontra arguidu. Tanba ne'e atu prevene arguidu nia aktu ne'e iha futuro, husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza haktuir katak bazeia ba produsaun prova iha audénsia julgamentu hanesan, arguidu konfesa faktu sira hotu, di'ak malu ona, arrende nia hahalok no foin primeiravés mai hatan iha tribunál. Tanba ne'e husu ba tribunál fó pena ne'ebé adekuadu ba arguidu.

Desizaun

Depoisde avalia, tetu no ezamina faktu hotu, tribunál prova katak faktu iha akuzasaun prokuradór nian provadu hotu bazeia ba konfisaun arguidu nian.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu 0,50 sentavus kada loron durante loron 80. Tribunál mós fiksa pena alternativa durante loron 53 prizaun, bainhira arguidu la kumpri pena multa refere.

4. Krime ofensa ba integridade fízika simples ho natureza VD

Nú. Prosesu	: 0010/24. BCMVS
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Ambrósio Rangel Freitas
Defeza	: Dr. António Fernandes
Desizaun	: Pena multa US\$15.00

Iha 02 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu MSF hasoru nia feto foun, iha Munisípiu Baukau.

Akuzasaun Prokuradór

Prokuradór akuza katak iha 19 Agostu 2024, iha oras tuku 12:30 meiodia, arguidu dudu ofendida no buti ofendida nia kakorok no rezulta ofendida sofre moras. Antes ne'e, arguidu ho ofendida diskute malu kona-ba ofendida bolu nia oan atu ba halo tuir ofendida nia moras.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu nega faktu sira iha akuzasaun no deklarata katak momentu ne'eba ofendida ho nia banin feto mak diskute malu no dudu malu. Arguidu mós deklarata katak sira seidak di'ak malu no foin primeiravés mai hatan iha tribunál.

Iha parte seluk ofendida kontinua konfirma faktu hotu iha akuzasaun no deklarata katak iha akontesementu ne'e ofendida bolu nia oan atu ba halo tuir nia moras hanesan ba sau haree kontinua ho vizita ofendida nai inan nia rate, maibé arguidu la hatan atu ofendida lori ho nia oan.

Alegasaun finál

Prokuradór haktuir katak mezmú arguidu nega faktu sira iha akuzasan maibé ofendida nafatin konfirma faktu iha akuzasaun no prokurador konsidera katak arguidu nia aktu priense krime ofensa ba integridade física simples ho natureza VD. Tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza haktuir katak bazeia ba produsaun ba prova ne'ebé produs iha audénsia julgamentu, husu ba tribunál fó pena ne'ebé justu ba arguidu.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu bazeia ba konfisaun arguidu nian no konfirma mós hosi ofendida.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu 0,50 sentavus kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

5. Krime ofensa ba integridade física simples ho natureza VD

Nú. Prosesu	: 0016/24. BCLGA
Kompozisaun Tribunál	: Singulár
Juisa	: Dra. Albertina da Conceição das Neves
Prokuradór	: Dr. Ambrósio Rangel Freitas
Defeza	: Dr. Sidonio Maria Sarmiento
Desizaun	: Pena multa US\$60.00

Iha 08 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu CJP hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 06 Jullu 2024, iha oras tuku 01:00 madrugada, arguidu kaer ofendida nia fuuk hodi dulas no hit sae halo ofendida nia ain la kona rai rezulta ofendida nia ulun moras no tuku dala tolu iha ulun no buti iha kakorok. Agressaun ne'e kauza hosi arguidu ho ofendida diskute malu kona-ba arguidu deskonfia ofendida ba mane seluk.

Prokuradór akuza arguidu kontra artigo 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigo 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu hotu ne'ebé akuza ba arguidu ne'e loos hotu, depoisde akontese ofendida ba hela iha nia inan-aman durante semana ida hafoin arguidu ba tuir rezolve no husu deskulpa ba ofendida. Arguidu deklara katak arrepende nia hahalok durante ne'e nunka baku ofendida no depoisde akontese mós la baku ona ofendida to'o agora.

Bazeia ba pedidu hosi prokuradór, tribunál presinde tiha ofendida nia deklarasaun tanba konsidera katak konfisaun arguidu nian sufisiénte ona. Iha parte seluk, defeza konkorda ho pedidu ne'e.

Alegasaun finál

Prokuradór haktuir katak faktu hotu-hotu provadu bazeia ba konfisaun arguidu nian. Mezmu sira di'ak malu ona maibé atu prevene arguidu repete hikas ninia aktu ne'e iha futuru tanba ema ne'ebé arguidu halo agressaun ne'e nia feen rasik tuir loloos arguidu mak tenke proteze maibé pelu-kontrariu arguidu mak halo fali agressaun hasoru ofendida. Tanba ne'e husu ba tribunál atu kondena arguidu ho pena multa US\$60.00

Entretantu, defeza haktuir katak bazeia ba produsaun prova arguidu konfesa, di'ak malu ona, arrepende ninia hahalok, nune'e husu ba tribunál atu fó pena ne'ebé kmaan ba arguidu.

Desizaun

Depoisde avalia faktu sira hotu, ne'ebé produs durante julgamentu tribunál konsidera faktu hotu iha akuzasaun prokuradór nian provadu hotu bazeia ba konfisaun arguidu nian.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loraun durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

6. Krime ofensa ba integridade fizika simples ho natureza VD

Nú. Prosesu : 0027/24. MNMNT
Kompozisaun Tribunál : Singulár
Juisa : Dra. Albertina da Conceição das Neves
Prokuradora : Dra. Remizia de Fatima da Silva
Defeza : Dra. Joana Cristina Pinto
Desizaun : Pena admoestasaun

Iha 09 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fizika simples ho natureza VD ne'ebé envolve arguidu EFB hasoru nia feen, iha Munisípiu Manatuto.

Akuzasaun Prokuradór

Prokuradór akuza katak, iha 24 Abril 2024, iha oras tuku 09:00 dadeer, arguidu uza ai-sanak baku dala ida iha ofendida nia liman kabun parte karuk. Antes ne'e, arguidu ho ofendida diskute malu kona-ba arguidu kalan la toba iha uma.

Prokuradór akuza arguidu kontra artigu 145 KP kona-ba ofensa ba integridade fizika simples ho nia moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrepende ninia hahalok no foin primeiravés mai hatan iha tribunál no di'ak malu ona ho ofendida.

Alende ne'e, ofendida mós konfirma faktu hotu iha akuzasaun no deklara katak di'ak malu ona no depoisde akontesementu ne'e to'o agora arguidu la komete tan krime hasoru ofendida.

Alegasaun finál

Prokuradór konsidera arguidu provadu komete krime hasoru ofendida bazeia ba konfisaun arguidu nian no konfirmasaun hosi ofendida. Tanba ne'e husu ba tribunál atu kondena arguidu tuir hahalok ne'ebé arguidu komete hasoru ofendida.

Alende ne'e, defeza husu ba tribunál atu fó pena admoestasaun ba arguidu ho konsiderasaun katak, arguidu konfesa, foin primeiravés mai hatan iha tribunál, di'ak malu ona no moris hamutuk hanesan feen ho la'en.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu bazeia ba konfisaun arguidu nian no konfirma mós hosi ofendida.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena admoestasaun.

7. Krime arma brankas

Nú. Prosesu : 0083/22. BCBCV
Kompozisaun Tribunál : Koletivu
Juiza : Dra. Albertina da Conceição das Neves, Dra.
Maria Solana da C. Fernandes no Dra. Sribuana
da Costa
Prokuradór : Dr. Ambrósio Rangel Freitas
Defeza : Dr. Agostinha de Oliveira
Desizaun : Pena prizaun tinan 1 suspende ba tinan 1

Iha 09 Jullu 2025, Tribunál Judisiál Primeira Instáncia Baukau, prezide leitura akordaun ba krime arma brankas ne'ebé envolve arguidu Agostu da Costa hasoru Estadu RDTL, iha Aldeia Aubaka, Suku Triloka, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 22 Maiu 2022, iha oras tuku 08:30, arguidu lori katana ba iha testemuña Manuel da Silva nia uma hodi diskute malu ho testemuña kona-ba testemuña uza arguidu nia mangeira dada bee, nune'e arguidu uza katana refere tetak rahun tiha testemuña nia mangeira.

Prokuradór akuza arguidu kontra artigu 2(nú.1(b), nú. 2(f)) no artigu 20(nú.1) ho moldura penal tinan 3 to'o tinan 6 hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, maibé arguidu deklara katak antes ne'e testemuña estraga uluk arguidu nia mangeira ne'e mak arguidu nervozu estraga fali testemuña nia mangeira. Arguidu hatutan katak depoisde akontese arguidu rasik ho testemuña rezolve ona problema ne'e, di'ak malu ona no troka fila fali testemuña nia mangeira, arrepende nia hahalok no foin primeiravés mai hatan iha tribunál.

Tribunál bazeia ba pedidu hosi prokuradór, presinde tiha testemuña nia deklarasaun tanba prokuradór konsidera faktu sufisiénte ona bazeia ba konfisaun arguidu nian. Iha parte seluk, defeza konkorda ho pedidu ne'e.

Alegasaun finál

Prokuradór haktuir katak arguidu konfesa faktu sira hanesan utiliza katana taa estraga mangeira, arguidu di'ak malu ona ho testemuña no fó fila fali testemuña nia mangeira, arrepende nia hahalok, razaun hirak ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak arguidu konfesa integralmente ba faktu sira iha akuzasaun, foin primieravés mai hatan iha tribunál, arrepende no di'ak malu ona inklui fó fila testemuña nia mangeira ne'ebé arguidu estraga. Tanba ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu bazeia ba konfisaun arguidu nian iha audénsia julgamentu no provadu mós arguidu ho testemuña di'ak malu ona no arguidu mós fó fila ona testemuña nia mangeira ne'ebé arguidu estraga.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e hodi halo atenuasaun extra-ordináriu no kondena arguidu ho pena prizaun tinan ida supende ba tinan ida.

8. Krime ofensa ba integridade fizika simples ho natureza VD

Nú. Prosesu : 0036/24. BCEVN
Kompozisaun Tribunál : Singulár
Juisa : Dra. Sribuana da Costa
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun fulan 2 suspende ba tinan 1

Iha 09 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fizika simples ho natureza VD ne'ebé envolve arguida ES hasoru nia la'en, iha Munisípiu Baukau.

Akuzasaun Prokuradór

Prokuradór akuza katak iha 11 Setembru 2024, iha oras tuku 17:00 lokraik, arguida foti fatuk tuda dala ida iha ofendidu nia kotuk laran no tuda dala ida iha ofendidu nia ain kabun parte loos tanba arguida ho ofendidu diskute malu kona-ba iskeru/gas.

Tuir mai iha 12 Setembru 2024, iha oras tuku 06:00 dadeer, arguida foti fatuk tuda dala ida iha ofendidu nia ulun rezulta kanek no raan. Antes ne'e, arguida ho ofendidu diskute malu kona-ba ofendidu husu osan sigaru nian ho folin US\$10.00, maibé arguida la fó.

Prokuradór akuza arguida kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguida deklara katak faktu no motivasaun problema iha akuzasaun ne'e loos hotu, maibé sira di'ak malu ona, arguida arrepente ninia hahalok, no sira iha oan na'in rua. Arguida haktuir liutan katak depoisde akontesimentu ne'e arguida la halo ona agresaun hasoru ofendidu.

Tribunál bazeia ba pedidu hosi prokuradór, presinde tiha ofendidu nia deklarasaun tanba prokuradór konsidera faktu sufisiénte ona bazeia ba konfisaun arguida nian. Iha parte seluk defeza konkorda ho pedidu ne'e.

Alegasaun finál

Prokuradór haktuir katak faktu hotu-hotu provadu bazeia ba konfisaun arguida nian katak arguida provadu komete krime hasoru ofendidu, mezmú sira di'ak

malu ona maibé atu prevene arguida repete hikas ninia aktu ne'e iha futuru, husu ba tribunál atu kondena arguida ho pena prizaun tinan ida suspende ba tinan ida.

Entretantu, defeza haktuir katak bazeia ba produsaun prova arguida konfesa, di'ak malu ona, arrepende ninia hahalok, nune'e husu ba tribunál atu fó pena ne'ebé kmaan ba arguida.

Desizaun

Depoisde avalia faktu sira hotu, ne'ebé produs durante julgamentu tribunál konsidera faktu hotu iha akuzasaun prokuradór nian provadu hotu bazeia ba konfisaun arguida nian.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguida ho pena prizaun fulan rua suspende ba tinan ida.

9. Krime ofensa ba integridade física simples ho natureza VD

Nú. Prosesu	: 0198/24. BCBCV
Kompozisaun Tribunál	: Singulár
Juisa	: Dra. Albertina da Conceição das Neves
Prokuradór	: Dr. Ambrósio rangel Freitas
Defeza	: Dr. Sidonio Maria Sarmiento
Desizaun	: Pena multa US\$30.00

Iha 09 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu NFX hasoru nia feen, iha Munisípiu Baukau.

Akuzasaun Prokuradór

Prokuradór akuza katak, iha 20 Novembru 2024, iha oras tuku 21:00 kalan, arguidu uza ai-sanak baku dala ida iha ofendida nia kabaas parte karuk, ain parte karuk no basa dala ida iha ulun. Antes ne'e, arguidu ho ofendida diskute malu kona-ba ofendida la'o ba nia inan aman nia uma no la halo modo.

Prokuradór akuza arguidu kontra artigo 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigo 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu hotu ne'ebé prokuradór akuza ba arguidu ne'e loos hotu. Arguidu foin primeiravés mai hatan iha tribunál, di'ak malu ona, arrepende ninia hahalok, to'o agora la baku ona ofendida. Arguidu serbisu nu'udar motorista ho vensimentu kada fulan US\$160.00.

Tribunál bazeia ba pedidu hosi prokuradór, presinde tiha ofendida nia deklarasaun tanba prokuradór konsidera faktu sufisiénte ona bazeia ba konfisaun arguidu nian. Iha parte seluk, defeza konkorda ho pedidu ne'e.

Alegasaun finál

Prokuradór haktuir katak arguidu provadu komete krime ofensa ba integridade fizika simples ho natureza VD. Ba interesse atu prevene krime ne'e akontese tan iha futuru, husu ba tribunál atu kondena arguidu ho pena prizaun fulan neen suspende ba tinan ida.

Alende ne'e, defeza haktuir katak bazeia ba audensia julgamentu arguidu konfesa no koopera ho tribunál hodi la difikulta tribunál atu deskobre verdade, foin primeiravés mai hatan iha tribunál, di'ak malu ona. Tanba ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu sira hotu, ne'ebé produs durante julgamentu tribunál konsidera faktu hotu iha akuzasaun prokuradór nian provadu hotu bazeia ba konfisaun arguidu nian.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

10. Krime ofensa ba integridade fizika simples

Nú. Prosesu	: 0029/24. BCEVN
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Bartolomeu de Araújo
Defeza	: Dr. Grigorio M. L. de Lima
Desizaun	: Pena multa US\$30.00

Iha 10 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fizika simples ne'ebé envolve arguidu Januario Ximenes Boavida hasoru Celestino Guterres (editál), iha Aldeia Fatulia, Suku Fatulia, Postu Administrativu Venilale, Munisípiu Baukau.

Akuzasaun Prokuradór

Prokuradór akuza katak, iha 24 Jullu 2024, iha oras tuku 09:15 kalan, iha serbisu fatin kompañia nian iha Osowake, arguidu tuku dala rua iha ofendida nia hasan parte karuk no rezulta raan no tebe dala ida ha kidan parte karuk rezulta bubu no moras. Kazu ne'e akontese, tanba arguidu deskonfia ofendidu kesar arguidu ba sira nia patraun.

Prokuradór akuza arguidu kontra artigu 145 KP kona-ba ofensa ba integridade fizika simples ho nia moldura penál to'o tinan 3 ka multa.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, ofendidu kesar arguidu ba sira nia patraun katak arguidu uza eksa ba dudu tetuk ema nia rai, tanba ne'e mak arguidu hirus. Arguidu arrepende ninia

hahalok no foin primeiravés mai hatan iha tribunál arguidu nu'udar motorista ho vensimentu kada fulan US\$200.00.

Alegasaun final

Prokuradór haktuir katak bazeia ba produsaun prova iha audénsia julgementu provadu katak arguidu komete krime hasoru ofendidu bazeia ba konfisaun arguidu nian ne'ebé konfirma akuzasaun prokuradór. Tanba ne'e husu ba tribunál atu kondena arguidu ho pena multa US\$20.00 no selu taxa diaria 0,50 sentavus.

Entretantu, defeza husu ba tribunál atu kondena arguidu ho pena ne'ebé justu ho konsiderasaun katak, arguidu konfesa, arrepende nia hahalok, di'ak malu ona no foin primeiravés mai hatan iha tribunál.

Desizaun

Depoisde avalia faktu sira hotu, ne'ebé produs durante julgamentu tribunál konsidera faktu sira iha akuzasaun prokuradór nian provadu hotu bazeia ba konfisaun arguidu nian.

Bazeia ba faktu provadu sira ne'e no sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loraun durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

11. Krime maus-tratus ba kónjuje

Nú. Prosesu	: 0006/22.BCEVN
Kompozisaun Tribunál	: Koletivu
Juisa	: Dra. Maria Solana da C. Fernandes, Dra. Sribuana da Costa no Dra. Maria Modesta d. A. Viera
Prokuradór	: Dr. Bartolomeu de Araújo
Defeza	: Dr. Grigorio M. L. de Lima
Desizaun	: Pena prizaun tinan 2 suspende ba tinan 2

Iha 14 Jullu 2025, Tribunál Judisiál Primeira Instánsia Baukau, prezide leitura akordaun ba krime maus-tratus ba kónjuje ne'ebé envolve arguidu EMdR hasoru nia feen, iha Munisípiu Baukau.

Akuzasaun Prokuradór

Prokuradór akuza katak Iha 07 Abril 2022, arguidu fila hosi Baukau haree sira nia oan tanis iha uma laran buka arguidu, nune'e arguidu ho ofendida diskute malu arguidu tebe dala ida iha ofendida niaulun parte loos, foti sapatu baka dala ida iha ofendida niaulun, ofendida la'o sai ba liur arguidu ba tuir hodi tuku tan dala rua iha ofendida niaulun no tebe dala rua iha ofendida niaulun.

Antes ne'e maizumenus iha tinan 2019, iha oras tuku 18:00 lokraik, arguidu basa, tuku no tebe dala barak iha ofendida nia isin no rezulta moras. Kazu ne'e akontese bainhira ofendida husu osan ba arguidu.

Maizumenus iha tinan 2020, iha oras tuku 17:30 lokraik, arguidu tuku dala iha ofendida nia reen-toos rezulta moras no bubu, tanba sira nia oan tanis.

Maizumenus iha tinan 2021, iha oras tuku 17:00 lokraik, arguidu tuku no tebe dala barak iha ofendida nia isin rezulta moras, tanba sira nia oan tanis.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé akontese iha 07 Abril 2022, ne'e loos hotu, inklui faktu sira akontese iha tinan 2019, 2020 no 2021 ne'e mós loos hotu. Arguidu deklara tan katak deposite akontesementu ikus sira di'ak malu to'o agora la baku ona ofendida, haree malu di'ak, arrepende nia hahalok no foin primeiravés mai hatan iha tribunál.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona, defeza laiha opozisaun ruma tanba ne'e tribunál presindi hodi la rona ofendida nia deklarasaun.

Alegasaun finál

Prokuradór haktuir katak haree ba produsaun ba prova hanesan arguidu nia aktu ne'e priense krime maus-tratus ba kónjuje tanba ofendida moris ho arguidu nu'udar feen, arguidu baku dala barak no halo tratamentu kruel hasoru ofendida. Tanba ne'e husu ba tribunál atu kondena arguidu ho pena minimu hosi krime ne'e suspende ba período hanesan.

Alende ne'e, defeza alega katak bazeia ba produsaun ba prova hanesan arguidu konfesa, arrepende nia hahalok no foin primeiravés mai hatan iha tribunál, husu ba tribunál fó pena ne'ebé adekuadu ba arguidu atu evita nia hahalok ne'e iha futuro.

Desizaun

Depoisde avalia faktu hotu, tribunál prova katak faktu iha akuzasaun provadu hotu bazeia ba konfisaun arguidu nian iha audénsia julgamentu katak arguidu halo duni tratamentu kruél hasoru ofendida.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu, arrepende ninia hahalok no foin primeiravés mai hatan iha tribunál, tribunál konklui prosesu ne'e no kondena arguidu ho pena prizaun tinan rua suspende ba tinan rua.

12. Krime maus-tratus ba kónjuje

Nú. Prosesu : 0015/22. VQSIC

Kompozisaun Tribunál : Koletivu
Juisa : Dra. Maria Solana da C. Fernandes, Dra.
Sribuana da Costa no Dra. Maria Modesta d. A.
Viera
Prokuradór : Dr. Bartolomeu de Araújo
Defeza : Dr. Grigorio M. L. de Lima
Desizaun : Pena prizaun tinan 2 suspende ba tinan 2

Iha 14 Jullu 2025, Tribunál Judisiál Primeira Instánsia Baukau, prezide leitura akordaun ba krime maus-tratus ba kónjuje ne'ebé envolve arguidu AG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak, iha 05 Novembru 2022, iha oras tuku 13:00 meiodia, arguidu foti tali kelen baku dala tolu iha ofendida nia liman kabun parte loos no baku dala ida iha kabaas parte loos. Arguidu mós baku dala ida iha kabun, tuku dala rua iha tilun hun, tuku dala rua iha ulun no lori liman sikun fai dala ida iha hirus matan. Agresaun ne'e kauza hosi arguidu ho ofendida diskute malu kona-ba hahan fahi nian.

Antes ne'e, maizumenus iha tinan 2020, arguidu tuku dala tolu iha ofendida nia hasan, tuku dala rua iha ulun. Iha akontesementu ne'e arguidu atu baku sira nia oan mak ofendida satan netik mak kona fali ofendida.

Maizumenus iha tinan 2021, arguidu basa dala tolu iha ofendida nia hasan no tuku dala ida iha ulun.

Prokuradór akuza arguidu kontra artigu 154 KP kona-ba maus-tratus ba konjuje ho moldura penál tinan 2 to'o tinan 6, konjuga ho artigu 2, 3 (a), 35 (a) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu. Arguidu deklara tan katak deposite akontese ikus sira di'ak malu to'o agora la baku ona ofendida, arrepende nia hahalok no foin primeiravés mai hatan iha tribunál.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona. Entrentantu defeza mós la manifesta objesaun ruma tanba ne'e tribunál presindi hodi la rona ofendida nia deklarasaun.

Alegasaun finál

Prokuradór haktuir katak haree ba produsaun prova akuzasaun prokuradór nian provadu bazeia ba konfisaun arguidu nian mezmú sira di'ak malu ona maibé nafatin prevene arguidu nia aktu ne'e iha futuro, husu ba tribunál atu kondena arguidu ho pena prizaun tinan tolu suspende ba tinan tolu.

Alende ne'e, defeza husu ba tribunál atu fó pena ne'ebé justu ho konsiderasaun katak arguidu konfesa, di'ak malu ona, arrepende nia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu, tuir konfisaun arguidu nian iha audénsia julgamentu katak arguidu halo duni tratamentu kruél hasoru ofendida.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira hotu, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

13. Krime ofensa ba integridade física simples ho natureza VD

Nú. Prosesu	: 0005/25. BCEVN
Kompozisaun Tribunál	: Singulár
Juisa	: Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dr. Sidonio Maria Sarmento
Desizaun	: Pena multa US\$40.00

Iha 15 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu NF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 22 Feveireiru 2025, iha oras tuku 08:00 dadeer, arguidu halo agresaun tuku dala rua iha kotuk laran, buti kakorok no basa dala iha hasan parte loos no basa dala ida iha hasan parte karuk. Antes ne'e, arguidu ho ofendida diskute malu kona-ba ofendida fakar tiha sasoro.

Prokuradór akuza arguidu kontra artigo 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigo 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu. Arguidudeklara tan iha momentu ne'eba sira nia hare kuda hotu ona, ne'e mak arguidu dehan atu ba ajuda kuda arguidu nia ama nia hare. Maibé, tanba la simu malu ofendida fakar fali sasoro ne'e mak halo arguidu hirus. Depoisde akontese sira di'ak malu fali ona, arrepende nia hahalok durante ne'e nunka baku ofendida no depoisde akontese mós la baku ona ofendida to'o agora. Arguidu serbisu nu'udar agrikultór ho rendimentu ne'ebé la fixu kada fulan.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona. Entretantu defeza mós la apresenta pozisaun kontraditoriu ruma tanba ne'e tribunál presindi hodi la rona ofendida nia deklarasaun.

Alegasaun finál

Prokuradór haktuir katak akuzasaun prokuradór nian provadu hotu, nune'e prokuradór konsidera arguidu komete aktu krime ne'e hasoru ofendida, nune'e mezmú sira di'ak malu ona maibé atu prevene arguidu repete hikas ninia aktu ne'e iha futuru, husu ba tribunál atu kondena arguidu ho pena multa US\$60.00 ho taxa diária US\$1.00.

Entretantu, defeza haktuir katak bazeia ba produsaun prova arguidu konfesa nia hahalok, di'ak malu ona, arrepende, nune'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak faktu sira deskreve iha akuzasaun prokuradór nian provadu hotu tuir konfisaun arguidu nian.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$40.00. Montante ne'e arguidu sei selu 0,50 sentavus kada loron durante loron 80. Tribunál mós fiksa pena alternativa durante loron 53 prizaun, bainhira arguidu la kumpri pena multa refere.

14. Krime ofensa ba integridade fízika simples ho natureza VD

Nú. Prosesu	: 0014/24. VQLLT
Juisa	: Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dr. Sidonio Maria Sarmiento
Desizaun	: Pena multa US\$30.00

Iha 15 Jullu 2025, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu RM hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 19 Dezembru 2024, iha oras tuku 15:30 lokraik, arguidu halo agresaun hasoru ofendida hanesan uza ai baku dala ida iha kanotak no uza ai refere hanehan ba ofendida nia kakorok. Antes ne'e, arguidu ho ofendida diskute malu kona-ba sira nia oan fila modo ho mina fahi.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira ha akuzasaun ne'e loos hotu. Maibé arguidu justifika katak arguidu moras no la han naan fahi ho mina fahi. Tuir loloos ofendida nu'udar inan fó hanoin ba sira nia oan ne'ebé ho idade tinan hitu (7). Tanba ne'e mak arguidu hirus ofendida. Mezmú nune'e, arguidu sente sala tanba forma família dezde tinan 2014, iha oan

na'in haat ona no foin primeiravés baku ofendida, depoisde akontese arguidu la baku ona ofendida no serbisu nu'udar agrikultór ho rendimentu la fixu.

Konsidera katak faktu sira sufisiente tanba arguidu admite kompletamente faktu sira iha akuzasaun, nune'e, prokuradór husu ba tribunál atu presinde ofendida ninia deklarasaun. Iha parte seluk, defeza laiha opozisaun tanba ne'e tribunál presindi hodi la rona ofendida nia depoimentu.

Alegasaun finál

Prokuradór haktuir katak arguidu konfesa integralmente ba faktu sira iha akuzasaun, no aktu ne'e priense duni elementu hosi krime ofensa ba integridade física simples ho natureza VD tanba ofendida moris hamutuk ho arguidu nu'udar arguidu nia feen. Tanba ne'e, atu prevene arguidu nia aktu ne'e no la hatoman-an ho violencia, husu ba tribunál atu kondena arguidu ho pena multa US\$60.00 ho taxa diaria US\$1.00.

Entretantu, defeza haktuir katak bazeia ba produsaun prova iha audénsia julgamentu arguidu konfesa faktu hotu, di'ak malu ona, arrepende nia hahalok no foin primeiravés mai hatan iha tribunál, nune'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál fiar katak faktu iha akuzasaun prokuradór nian provadu hotu tuir konfisaun arguidu nian.

Bazeia ba faktu provadu sira ne'e hotu no sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

15. Krime ofensa ba integridade física simples ho natureza VD

Nú. Prosesu	: 0066/24. MNMNT
Juisa	: Dra. Maria Modesta d. A. Viera
Prokuradór	: Dr. Ambrósio Rangel Freitas
Defeza	: Dra. Joana Cristina Pinto
Desizaun	: Pena multa US\$30.00

Iha 15 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu FS hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 04 Outubru 2024, iha oras tuku 13:00 meiodia, arguidu halo agresaun hasoru ofendida hanesan tuku dala ida iha kabaas parte loos no tuku dala ida iha tilun parte loos rezulta kanek no raan. Agresaun ne'e akontese tanba arguidu ho ofendida diskute malu kona-ba arguidu fila uma lori de'it kapasete maibé motor la lori.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira ha akuzasaun ne'e loos hotu no deklara tan katak mosu diskusaun kona-ba motor aat. Depoisde akontese sira di'ak malu ona, arrepende nia hahalok durante moris hamutuk iha tinan 2015, foin primeiravés halo agresaun hasoru ofendida. Arguidu hatutan katak depoisde akontese arguidu la baku ona ofendida no serbisu nu'udar agrikultór ho rendimentu la fixu.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona. Iha parte seluk defeza konkorda ho pozisaun prokuradór nian tanba ne'e tribunál presindi hodi la rona ofendida nia depoimentu.

Alegasaun finál

Prokuradór haktuir katak akuzasaun prokuradór nian provadu bazeia ba konfisaun arguidu nian tanba ema ne'ebé arguidu baku ne'e arguidu nia feen rasik tuir loloos arguidu mak proteze ofendida hanesan feen. Maibé arguidu mak halo fali agresaun hasoru ofendida. Atu prevene arguidu nia aktu iha futuro, husu ba tribunál atu kondena arguidu ho pena multa loron US\$60 ho taxa diaria US\$1.00.

Entretantu, defeza haktuir katak bazeia ba produsaun ba prova arguidu konfesa faktu, di'ak malu ona, arrepende nia hahalok no foin primeiravés mai hatan iha tribunál, nune'e husu ba tribunál fó pena multa ba arguidu bazeia ba arguidu nia rendementu.

Desizaun

Depoisde avalia faktu hotu ne'ebé produs durante julgamentu, tribunál prova katak faktu iha akuzasaun prokuradór nian provadu hotu bazeia ba konfisaun arguidu nian.

Bazeia ba faktu provadu sira ne'e hotu no sirkunstánsia hotu-hotu ne'ebé asosia ho krime ne'e, ikusma itribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

16. Krime maus-tratus ba kónjuje

Nú. Prosesu	: 0001/24. LALMAR
Kompozisaun Tribunál	: Koletivu
Juisa	: Dra. Maria Modesta d. A. Viera, Dra. Maria Solanada C. Fernandes no Dra. Sribuana da Costa
Prokuradór	: Dr. Bartolomeu de Araújo
Defeza	: Dr. Grigorio M. L. de Lima
Desizaun	: Pena prizaun tinan 2 suspende ba tinan 2

Iha 16 Jullu 2025, Tribunál Judisiál Primeira Instánsia Baukau, prezide leitura akordaun ba krime maus-tratus ba kónjuje ne'ebé envolve arguidu CfdA hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 02 Janeiro 2024, iha oras tuku 21:00 kalan, arguidu tuku dala lima iha ofendida nia kotuk laran, tebe dala rua iha ain parte loos, no uza kadeira masa atu baku ofendida mak ofendida satan netik ho liman nune'e kona fali ofendida nia liman parte loos. Antes ne'e, arguidu ho ofendida diskute malu kona-ba ofendida atu lori sira nia oan ba vizita nia avo sira maibé arguidu la aseita.

Antes ne'e iha tinan 2022, arguidu tuku no tebe dala barak iha ofendida nia isin, maibé ofendida la ba ható'o keixa.

Iha 18 Setembru 2021, arguidu tuku iha ofendida nia kotuk laran, maibé ofendida la ba ható'o keixa.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 no konjuga ho artigu 2, 3 (a), 35 (a) no 36 LKVD.

Produsaun ba prova sira

Iha prosesu julgamentu, arguidu deklara katak iha tinan 2022, ofendida uza besi kanu atu baku arguidu mak arguidu kaer no soe tiha. Maibé depois ofendida foti tudik atu sona arguidu, la konsege nune'e ofendida foti kadeira masa baku ba arguidu ne'e mak arguidu basa dala ida iha ofendida nia hasan, no arguidu la tebe ofendida. Kona-ba faktu sira seluk arguidu la iha kuñesementu, arrepende nia hahalok, seidauk di'ak malu no foin primeiravés mai hatan iha tribunál.

Entretantu, ofendida deklara katak iha 18 Setembru 2021, iha Dili arguidu mak uza besi kotak (baza ringan) baku ba iha ofendida nia ain, tuku no tebe ofendida nia isin, maibé iha akontesementu ne'e ofendida la apresenta keixa. Iha tinan 2022, ofendida konfirma faktu iha akuzasaun maibé ofendida nafatin la apresenta keixa. Akontese iha 02 Janeiro 2024, ofendida konfirma akuzasaun no iha akontesementu ne'e mak ofendida foin apresenta keixa ba iha Eskuadra Polísia Iliomar kontinua moris separa ho arguidu.

Alegasaun finál

Prokuradór haktuir katak mezmú arguidu koko atu nega faktu balun, maibé prokuradór konsidera arguidu provadu komete krime maus-tratus ba kónjuje bazeia ba ofendida nia konfirmasaun ba akuzasaun katak arguidu nia aktu ne'e ofendida diside moris separa ho arguidu, nune'e husu ba tribunál atu kondena arguidu ho pena prizaun tinan rua suspende ba tinan rua.

Iha parte seluk, defeza haktuir katak arguidu deklara deit faktu ne'ebé arguidu komete hasoru ofendida. Tanba ne'e husu ba tribunál fó pena ne'ebé adekuadu ba arguidu.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu, mezmú arguidu koko atu nega faktu balun, maibé tribunál fiar liu ba deklarasaun ofendida nian.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé hakmaan no hatodan arguidu no tribunál mós konsidera katak arguidu halo tratamentu kruel hasoru ofendida. Tanba ne'e tribunal konklui prosesu ne'e no kondena arguidu ho pena prizaun tinan rua suspende ba tinan rua.

17. Krime maus-tratus ba kónjuje

Nú. Prosesu	: 0021/23. BCLGA
Kompozisaun Tribunál	: Koletivu
Juisa	: Dra. Sribuana da Costa, Dra. Albertina da Conceição das Neves no Dra. Maria Modesta d. A. Viera
Prokuradór	: Dr. Bartolomeu de Araújo
Defeza	: Dr. Grigorio M. L. de Lima
Desizaun	: Pena prizaun tinan 3 suspende ba tinan 3

Iha 16 Juñu 2025, Tribunál Judisiál Primeira Instánsia Baukau, prezide leitura akordaun ba krime maus-tratus ba kónjuje ne'ebé envolve arguidu JBdJ hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 22 Novembru 2023, iha oras tuku 16:00 lokraik, arguidu halo agresaun hasoru ofendida hanesan basa dala ida iha hasan parte loos no tebe dala ida iha ain parte loos no hadau tiha ofendida nia osan US\$10.00 hodi lori tiha ba arguidu nia inan aman nia uma.

Tuir mai iha 28 Novembru 2023, ofendida ho nia alin ba tuir arguidu iha nia inan nia uma nune'e arguidu nia inan duni tiha ofendida hafoin arguidu aperta ofendida nia kakorok riba ba rai no tebe tan dala ida iha ofendida nia sorin parte karuk. Antes ne'e, arguidu ho ofendida diskute malu kona-ba atu hamos kantareiru hodi kuda tomate.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3 (a) no 35 (a) no 36 LKVD.

Produsaun ba prova sira

Iha produsaun ba prova, arguidu deklara katak iha 22 Novembru 2023, ne'e arguidu ho ofendida diskute malu no arguidu la halo agresaun hasoru ofendida maibé arguidu foti de'it ofendida nia telefone ho osan US\$10.00 mak iha telefone nia kotuk la'os hadau ofendida nia osan.

Iha 28 Novembru 2023, ofendida ba arguidu sira nia uma istori malu ho arguidu nia inan ne'e mak arguidu dada ses tiha ofendida nia liman mak liman kukun kona ofendida nia kakorok no ofendida nia ain kois monu tun tiha.

Iha parte seluk ofendida konfirma faktu sira iha akuzasaun no deklarasaun tan katak di'ak malu ona no depoisde akontese mos arguidu la baku ona ofendida.

Testemuña RPFL nu'udar ofendida nia alin mane depoimentu katak iha 22 Novembru 2023, iha sira nia uma, testemuña iha oin no haree ho matan arguidu basa dala iha ofendida nia hasan. Enkuantu iha 28 Novembru 2023, momentu testemuña ho ofendida ba iha arguidu nia uma arguidu ho ofendida diskute malu, testemuña iha oin no haree arguidu buti ofendida nia kakorok no riba ba rai nune'e testemuña ho ofendida kontinua ba hato'o keixa iha Eskuadra Polisia Laga.

Alegasaun final

Prokurador konsidera arguidu provadu komete krime hasoru ofendida mezm arguidu konfesa parsial maibe ofendida konfirma faktu hotu iha akuzasaun no testemuña mos depoimenta katak akontese dala rua ne'e sempre iha oin no haree ho matan arguidu nia aktu hasoru ofendida. Mezm arguidu ho ofendida di'ak malu ona maibe atu prevene arguidu la repete hikas ninia aktu ne'e iha futuru, husu ba tribunál atu kondena arguidu ho pena prizaun tinan rua suspende ba tinan rua.

Entretantu, defeza haktuir katak iha audénsia julgamentu arguidu konfesa faktu ne'ebé konstitui ba krime ho konsiderasaun katak arguidu arrepende nia hahalok, di'ak malu ona no foin primeiravés mai hatan iha tribunál, tanba ne'e husu ba tribunál fó pena adekua ba arguidu.

Desizaun

Depoisde avalia faktu hotu, tribunál konsidera faktu hotu iha akuzasaun prokurador nian provadu hotu bazeia ba ofendida nia deklarasaun no testemuña nia depoimentu.

Haktuir faktu provadu sira ne'e hotu no tetu mos ho sirkunstánsia hotu-hotu ne'ebé hakmaan no hatodan arguidu no tribunál konsidera katak arguidu halo duni tratamentu violentu no bebeik hasoru ofendida. Tanba ne'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

18. Krime ofensa ba integridade física simples ho natureza VD

Nú. Prosesu	: 0069/24. LASIC
Kompozisaun Tribunál	: Singulár
Juisa	: Dra. Albertina da Conceição das Neves
Prokurador	: Dr. Bartolomeu de Araújo
Defeza	: Dr. Sidonio Maria Sarmento
Desizaun	: Pena multa US\$30.00

Iha 21 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu DdC hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 13 Setembru 2024, iha oras tuku 10:00 dadeer, ofendida ho nia kuñada ba sosa batat nurak iha merkadu atu tunu hodi faan. Arguidu telefone tui dehan labarik tanis, ofendida hatan fila ona, bainhira ofendida to'o uma arguidu basa dala ida iha ulun, tebe dala ida iha kanotak, ofendida tama ba uma laran arguidu ba tui basa tan dala ida iha ulun.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak ofendida ba merkadu kleur loos, arguidu mós serbisu hanesan badaen no oras to'o ona atu ba serbisu ofendida seidauk fila. Arguidu telefone tui dala tolu dehan fila ona maibé arguidu hein tuku 10:00 mak ofendida fila. Arguidu admite katak nia halo duni agresaun hanesan iha akuzasaun, maibé sira di'ak malu ona, arrepende nia hahalok no foin primeiravés mai hatan iha tribunál.

Alende ne'e ofendida deklara katak arguidu ho labarik sei toba ne'e mak ofendida husu ba merkadu to'o merkadu la kleur arguidu kontaktu dehan labarik hadeer ona. Bainhira ofendida fila ba uma arguidu halo kedas agresaun hanesan iha akuzasaun hasoru ofendida. Ofendida mós konfirma katak di'ak malu ona no to'o agora la baku ona ofendida.

Alegasaun finál

Prokuradór haktuir katak bazeia ba produsaun ba prova arguidu nia aktu ne'e priense krime ofensa ba integridade física simples ho natureza VD ne'ebé akuza ba arguidu. Mezmu sira di'ak malu ona maibé atu nafatin prevene arguidu nia aktu ne'e iha futuru husu ba tribunál atu kondena arguidu ho pena prizaun fulan rua suspende ba tinan ida.

Entretantu, defeza haktuir katak bazeia ba produsaun ba prova iha prosesu julgamentu hanesan arguidu konfesa, di'ak malu ona, arrepende nia hahalok no foin primeiravés mai hatan iha tribunál. Tanba ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál konsidera faktu sira iha akuzasaun prokuradór nian provadu hotu tui konfisaun arguidu nian no konfirmasaun ofendida nian.

Relasiona ho faktu provadu sira ne'e hotu no sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

19. Krime ofensa ba integridade física simples

Nú. Prosesu : 0014/24.LALRO
Kompozisaun Tribunál : Singulár
Juisa : Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. Gregorio M. L. de Lima
Desizaun : Pena multa US\$75.00

Iha 22 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ne'ebé envolve arguidu Augusto Ximenes hasoru nia kuñada Juvita Ricardo, iha Munisípiu Lautein.

Akuzasaun Prokuradór

Prokuradór akuza katak iha 15 Outubru 2024, iha oras tuku 09:00 dadeer, iha Merkadu Luro arguidu diskuti malu ho ofendida nia la'en ofendida halo intervensaun, arguidu lasimu hodi rasta ofendida nia liman, tau iha motor leten hodi silu halo ofendida nia liman moras.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Iha prosesu julgamentu, arguidu konfesa integralmente ba faktu hotu ne'ebé mak hakerek iha akuzasaun prokuradór nian, arrepende ninia hahalok no promete sei la komete tan krime ne'e iha futuro.

Alende ne'e, ofendida kontinua konfirma faktu sira iha akuzasaun ofendida deklar katak arguidu diskute malu ho nia la'en nune'e nia ba hapara mak arguidu silu fali ofendida nia liman.

Alegasaun finál

Prokuradór haktuir katak durante produsaun ba prova arguidu konfesa ba faktu hotu ne'ebé mak hakerek iha akuzasaun, nune'e husu ba tribunál atu kondena arguidu ho pena multa US\$60.00 ho taxa diaria 050 sentavus.

Alende ne'e, defeza haktuir katak arguidu konfesa faktu hotu saida mak nia halo, nune'e defeza aseita prokuradór nia alegasaun atu kondena arguidu ho pena multa.

Desizaun

Depoisde avalia faktu hotu, tribunál prova katak faktu iha akuzasaun prokuradór nian provadu hotu bazeia ba konfisaun arguidu nian no konfirma mós hosi ofendida.

Bazeia ba faktu provadu sira ne'e hotu no sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$75.00 ne'ebé arguidu sei selu US\$1.00 kada loron durante loron 75. Tribunál mós fiksa pena alternativa durante loron 50 prizaun, bainhira arguidu la kumpri pena multa refere no selu mós kustu judisiál US\$5.00.

20. Krime ofensa ba integridade fízika simples ho natureza VD

Nú. Prosesu : 0012/24. BCBQI
Kompozisaun Tribunál : Singulár
Juisa : Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. António Fenandes
Desizaun : Pena prizaun tinan 1 suspende ba tinan 1 fulan 6

Iha 24 Jullu 2025, Tribunál Judisiál Primeira Instáncia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu AdSG hasoru nia feen segundu, iha Munisípiu Baukau.

Akuzasaun Prokuradór

Prokuradór akuza katak iha 08 Jullu 2024, iha oras tuku 19:00 kalan, arguidu basa dala ida iha ofendida nia hasan parte karuk no tuku dala ida iha susun parte loos. Antes ne'e, ofendida ho arguidu nia feen primeiru baku malu.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak ofendida baku arguidu nia feen primeiru no feen primeiru monu ofendida tuur tiha iha leten mak buti feen primeiru nia kakorok ne'e mak arguidu dada sees tiha ofendida. Maibé ofendida hakarak baku nafatin feen primeiru ne'e mak arguidu hirus basa dala ida iha ofendida nia hasan parte karuk no tuku dala ida iha susun parte loos. Arguidu deklara katak nia iha feen na'in rua hela hamutuk de'it iha uma ida, no depeoisde akontesementu sira di'ak malu ona, arrepende nia hahalok, to'o agora la baku ona ofendida. Arguidu nu'udar agrikultór rezultadu hodi sustenta de'it ba família oan na'in ualu ho feen na'in rua.

Prokuradór konsidera faktu sira suficiente ona no husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun. Nune'e mós defeza laiha objesaun ruma tanba ne'e tribunál presindi hodi la rona ofendida nia deklarasaun.

Alegasaun finál

Prokuradór haktuir katak arguidu konfesa integralmente ba faktu sira iha akuzasaun, katak ofendida ho feen primeiru baku malu no tuir loloos arguidu iha meus seluk atu rezolve la'os uza fali violensia. Agora dadauk arguidu ho feen na'in rua nafatin moris hamutuk ho arguidu iha uma ida. Mezmu nune'e atu prevene arguidu nia aktu ne'e iha futuro husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak iha produsaun ba prova arguidu konfesa integralmente ba faktu hotu iha akuzasaun, di'ak malu ona, arrepende nia

hahalok no foin primeiravés mai hatan iha tribunál. Tanba ne'e husu ba tribunál atu fó pena kmaan ba arguidu.

Desizaun

Depoisde avalia faktu hotu, tribunál prova katak faktu sira iha akuzasaun prokuradór nian provadu hotu no kontinua reforsa liután ho konfisaun arguidu nian.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

21. Krime ofensa ba integridade fizika simples

Nú. Prosesu	: 0027/24. BCQLC
Kompozisaun Tribunál	: Singulár
Juisa	: Dra. Maria Modesta D. A. Viera
Prokuradora	: Dra. Remizia de Fatima
Defeza	: Dr. Grigorio M. L. de Lima
Desizaun	: Pena multa US\$40.00

Iha 15 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ne'ebé envolve arguidu Paul da Costa hasoru Mariano Antonio Cabral, iha Suku Laisorulai, Posto Administrativo Kelikai, Munisípiu Baukau.

Akuzasaun Prokuradór

Prokuradór akuza katak, iha 12 Dezembru 2024, iha oras tuku 20:00 kalan, ofendidu tuur hela iha uma laran haree hela telefone derepente arguidu mosu mai hakilar dehan Marsiano Dunau "ó la konsidera há'u." Rona tiha ida-ne'e ofendidu hamrik sai ba liur husu tuir saida mak ofendidu la kosidera, maibé arguidu buti kedas ofendidu nia kakorok ho maka'as nune'e testemuña Domingos Cabral mai sori netik no dada sai arguidu nia liman maibé la konsege, hafoin testemuña Juvito mak konsege dada sees tiha arguidu./ Aproveita ida ne'e ofendidu kontaktu OPS no la kleur OPS to'o iha fatin akontesementu.

Prokuradór akuza arguidu kontra artigo 145 KP kona-ba ofensa ba integridade fízika simples ho nia moldura penál to'o tinan 3 ka multa.

Produsaun ba prova sira

Iha prosesu julgamentu, arguidu deklara katak faktu sira elaboradu iha akuzasaun ne'e loos hotu. Arguidu esklarese katak iha momentu ne'eba sira han hela naan asu no hemu tua besik bee matan ne'ebé ofendidu sira mak liga eletrisidade iha fatin refere, derepente eletrisidade mate no sira tuur iha nakukun laran ne'e mak arguidu hirus. Maibé arguidu deklara katak arrepende nia hahalok, foin primeiravés mai hatan iha tribunál nu'udar agrikultór rendimentu la fixu.

Alende ne'e, ofendidu deklara katak tuur iha uma laran heree hela telefone la hatene buat ida derepente arguidu mai hakilar no buti ofendidu nia kakorok.

Tanba ne'e mesmuhakarak di'ak malu maibé sentimentu nu'udar ema mak to'o agora laran sei triste no moras.

Alegasaun finál

Prokuradora haktuir katak akuzasaun prokuradór prosedente provadu tanba ofendidu konfirma totalmente ba akuzasaun. Enkuantu arguidu la hatudu ninia arrendementu tanba kazu ne'e akontese arguidu nunka buka ofendidu atu rezolve no to'o agora ofendidu sei laran moras/triste ba arguidu nia aktu. Tanba ne'e husu ba tribunál atu kondena arguidu ho pena multa tuir rendimentu arguidu nian nu'udar agrikultór.

Entretantu, defeza haktuir katak iha produsaun ba prova arguidu konfesa katak buti ofendidu nia kakorok, foin primeiravés mai hatan iha tribunál, tanba sira besik malu, ne'e defeza husu ba tribunál atu fó suspensaun ba arguidu hodi evita arguidu nia aktu ne'e iha futuro.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu bazeia ba konfisaun arguidu nian no ofendidu nia konfirmasaun.

Relasiona ho faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu 0,50 sentavus kada loron durante loron 80. Tribunál mós fiksa pena alternativa durante loron 53 prizaun, bainhira arguidu la kumpri pena multa refere.

22. Krime arma brankas

Nú. Prosesu	: 0009/22. BCEVN
Kompozisaun Tribunál	: Koletivu
Juisa	: Dra. Sribuana da Costa, Dra. Albertina da Conceição das Neves no Dra. Maria Modesta d. A. Viera
Prokuradór	: Dr. Bartolomeu de Araújo
Defeza	: Dr. Grigorio M. L. de Lima
Desizaun	: Pena prizaun tinan 3 suspende ba tinan 3

Iha 29 Jullu 2025, Tribunál Judisiál Primeira Instánsia Baukau prezide leitura akordaun ba krime arma brankas ne'ebé envolve arguidu Abilio Gomes hasoru Estadu RDTL, iha Aldeia Laku-Uma, Suku Bahamori, Postu Administrativu Venilale, Munisípiu Baukau.

Akuzasaun Prokuradór

Prokuradór akuza katak iha 24 Maiu 2024, iha oras tuku 12:00 meiodia, arguidu nia inan/testemuña husu osan ba arguidu atu selu labarik nia eskola tanba arguidu la fó osan nune'e sira diskute malu arguidu nervozu foti katana taa estraga testemuña nia didin uma nian no ameasa testemuña dehan "há'u sei oho ó fahe tiha ba rua".

Prokuradór akuza arguidu kontra artigu 2(nú.1(b), nú. 2(f)) no artigu 20(nú.1) ho moldura penál tinan 3 to'o tinan 6 hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon hosi Kinta Alterasaun Kódigu Penál.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrepende nia hahalok promete iha futuru sei la komete tan aktu ne'e, di'ak malu ona ho testemuña no husu ona deskulpa ba testemuña nu'udar nia inan no foin primeiravés mai hatan iha tribunál.

Prokuradór husu ba tribunál atu presinde testemuña ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona. Iha parte seluk defeza konkorda ho prokuradór ninia pedidu, tanba ne'e tribunál presindi hodi la rona ofendida nia depoimentu.

Alegasaun finál

Prokuradór haktuir katak arguidu konfesa faktu sira hanesan transforma katana nia funsaun ba krime hanesan taa estraga didin uma nian no ameasa testemuña, arguidu di'ak malu ona ho testemuña, arrepende nia hahalok, ho razaun hirak ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza haktuir katak arguidu konfesa integralmente ba faktu sira iha akuzasaun foin primieravés mai hatan iha tribunál, arrepende no di'ak malu ona ho testemuña, arguidu nu'udar oan husu ona deskulpa ba testemuña nu'udar inan. Tanba ne'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu tuir konfisaun arguidu nian.

Tanba ne'e, bazeia ba faktu provadu sira ne'e hotu no sirkunstánsia relasionadu sira hosi krime ne'e, tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

23. Krime ofensa ba integridade física simple ho natureza VD

Nu. Prosesu	: 0174/24.BCBCV
Kompozisaun Tribunál	: Singulár
Juisa	: Dra. Albertina da Conceição das Neves
Prokuradora	: Dra. Remizia de Fátima da Silva
Defeza	: Dr. Albino de Jesus Perreira
Desizaun	: Pena multa US\$45.00

Iha 29 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu RMBd hasoru nia feen, iha Munisípiu Baukau.

Akuzasaun Prokuradór

Prokuradór akuza katak, 18 Outubru 2024, iha oras tuku 00:30 kalan, arguidu fila ba uma ho kondisaun lanu, halo barullu iha uma no tolok. Ofendida haruka arguidu nonook tanba kalan boot no viziñu sira toba ona, maibé arguidu nervozu foti telefone hodi tuku ho maka'as dala-ida ba ofendida niaulun parte karuk rezulta kanek no bubu. Aktu ne'e rezulta ofendida ba halo tratamentu iha ospital no suku pontu haat iha parte ulun depoisde akontese ofendida ba hela tiha iha Uma-mahon durante semana ida.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrepende nia hahalok, di'ak malu ona no foin primeiravés mai hatan iha tribunál. Arguidu deklara liutan katak depoisde akontese arguidu la hemu ona tua, la baku ona ofendida, Arguidu esklares katak depoisde akontesementu ne'e, ofendida ba hela tiha iha Uma-mahon, no arguidu mak ba tuir bolu fali ofendida iha Uma-mahon no sira hela hamutuk nafatin to'o agora.

Alende ne'e, ofendida mós konfirma faktu hotu iha akuzasaun no deklara katak depoisde akontesementu ne'e, ofendida ba hela iha Uma-mahon durante semana ida resin, arguidu ba tuir ofendida no sira fila ba uma no to'o agora arguidu la hemu ona tua no la baku ona ofendida.

Alegasaun finál

Prokuradór haktuir katak haree ba produsaun ba prova arguidu nia aktu ne'e priense krime ne'ebé akuza ba arguidu. Tanba ne'e atu prevene iha futuru arguidu la repete tan aktu hanesan hasoru ofendida, husu ba tribunál atu fó kondenasaun ba arguidu tuir hahalok ne'ebé arguidu halo hasoru ofendida.

Alende ne'e, defeza husu ba tribunál atu fó pena ne'ebé justu ba arguidu ho konsiderasaun katak, arguidu konfesa, arrepende ninia hahalok, di'ak malu ona no foin primieravés mai hatan iha tribunál, arguidu konfesa faktu hotu ne'ebé akuza ba nia no sira di'ak malu ona no moris hamutuk nafatin hanesan feen ho la'en.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu bazeia ba konfisaun arguidu nian no konfirmasaun ofendida nian.

Ho konsiderasaun ba faktu provadu sira ne'e hotu nomós sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

24. Krime ofensa ba integridade fizika simples ho natureza VD

Nú. Prosesu : 0190/24. BCBCV

Kompozisaun tribunal : Singulár
Juisa : Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Grigorio M. L. de Lima
Desizaun : Pena multa US\$60.00

Iha 30 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu EdCB hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 08 Novembru 2024, iha oras tuku 19:30 kalan, arguidu uza ai-dona baku dala ida iha hasan parte loos no buti iha kakorok tanba arguidu ho ofendida diskute malu kona-ba tali karegador telefone nian. Agresaun ne'e rezulta ofendida sofre moras iha parte hasan no kakorok.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu no motivasaun problema iha akuzasaun ne'e loos hotu. Depoisde akontese liu fulan ida sira di'ak malu ona, arrepende nia hahalok durante moris hamutuk iha oan na'in haat ona foin primeiravés halo agresaun hasoru ofendida, depoisde akontese arguidu la baku ona ofendida no serbisu nu'udar agrikultór rezultadu hodi sustenta de'it ba família.

Prokuradór husu ba tribunál atu presinde ofendida ninia depoimentu, tanba arguidu konfesa integralmente ba faktu hotu iha akuzasaun, nune'e faktu sufisiénte ona, enkuantu defeza rasik laiha opozisaun tanba ne'e tribunál presindi hodi la rona ofendida nia deklarasaun.

Alegasaun finál

Prokuradór haktuir katak faktu hotu-hotu provadu bazeia ba konfisaun arguidu nian katak arguidu provadu komete krime ofensa ba integridade fízika simples ho natureza VD tanba ema ne'ebé arguidu baku ne'e nia feen rasik. Tanba ne'e, mezmua sira di'ak malu ona maibé atu prevene arguidu repete hikas ninia aktu ne'e iha futuru, husu ba tribunál atu kondena arguidu ho pena multa US\$60.00 no taxa diaria S\$1.00.

Entretantu, defeza haktuir katak bazeia ba produsaun prova arguida konfesa, di'ak malu ona, arrepende ninia hahalok, husu tribunál fó pena adekuadu ba arguidu.

Desizaun

Depoisde avalia faktu hotu no sirkunstánsia relevante sira, tribunál konsidera faktu hotu iha akuzasaun prokuradór nian provadu hotu tuir konfisaun arguidu nian.

Bazeia ba faktu provadu sira ne'e hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loraun durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

25. Krime maus-tratus ba konjúje

Nú. Prosesu	: 0034/23.VQWTL
Kompozisaun Tribunál	: Koletivu
Juisa	: Dra. Sribuana da Costa, Dra. Albertina da Conceição das Neves no Dra. Maria Modesta d. A. Viera
Prokuradór	: Dr. Julio da Silva Correia
Defeza	: Dr. António Fernandes
Desizaun	: Pena prizaun tinan 3 suspende ba tinan 3

Iha 30 Jullu 2025 Tribunál, Judisiál Primeira Instancia Baukau, prezide leitura akordaun ba krime maus-tratus ba konjúje ne'ebé envolve arguidu JAG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 20 Agosto 2023, maizumenus iha oras tuku 19:00 kalan, arguidu hodi kadeira masa atu baku dala tolu ba ofendida niaulun, maibé la kona iha ofendida niaulun no kona fali iha ofendida nia liman parte karuk, tanba ofendida lori liman parte karuk satan netik. Arguidu mós kontinua tebe dala rua iha ofendida nia kotuk laran no tolok ofendida.

Antes maizumenus iha tinan 2017, iha oras tuku 14:00 lokraik, arguidu hodi fatuk tuda dala ida iha ofendida nia ain parte karuk, tanba arguidu ho ofendida diskute malu kona-ba arguidu haruka ofendida atu tein etu.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o 6 prizaun konjuga ho artigu 2, 3 (a), 35 (a) no 36 LKVD.

Produsaun ba prova sira

Arguidu konfesa faktu hotu ne'ebé mak hakerek iha akuzasaun prokuradór nian, arrepende ninia hahalok no husu ona deskulpa ba ofendida. Arguidu ho ofendida di'ak malu ona moris hamutuk nafatin hanesan feen ho la'en.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona. Alende ne'e defeza mós konkorda ho pedidu ne'e, tanba ne'e tribunál presindi hodi la rona ofendida nia deklarasaun.

Alegasaun finál

Prokuradór haktuir katak arguidu konfesa ba aktu ne'ebé mak nia halo hasoru ofendida, prokuradór entende katak faktu iha akuzasaun ne'e provadu hotu, tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Entretantu, defeza hatuir katak iha julgamentu arguidu konfesa momós ba aktu ne'ebé mak nia halo hasoru ofendida, no arguidu ho ofendida di'ak malu ona moris hamutuk nafatin hanesan feen ho la'en. Tanba ne'e husu ba tribunál fó pena kmaan ba arguidu.

Desizaun

Depoisde avalia faktu sira hotu ne'ebé produs durante julgamentu tribunál konsidera faktu hotu iha akuzasaun prokuradór nian provadu hotu katak arguidu halo tratamentu kruel hasoru ofendida nu'udar feen.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé hatodan no hakmaan arguidu, tribunál konklui prosesu ne'e no kondena arguidu ho pena prizaun tinan rua suspende ba tinan rua.

26. Krime maus-tratus ba kónjuje

Nú. Prosesu	: 0029/23.VQVQQ
Kompozisaun Tribunál	: Koletivu
Juisa	: Dra. Sribuana da Costa, Dra. Albertina da Conceição das Neves no Dra. Maria Solana da C Fernandes
Prokuradór	: Dr. Bartolomeu de Araujo
Defeza	: Dr. Grigorio M. L. de Lima
Desizaun	: Pena prizaun tinan 2 suspende ba tinan 2

Iha 30 Jullu 2025, Tribunál Judisiál Primeira Instansia Baukau, prezide leitura akordaun ba krime maus-tratus ba kónjuje ne'ebé envolve arguidu AVG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 13 Maiu 2023, iha oras tuku 20:00 kalan, arguidu tuku dala neen iha ofendida nia ulun, tuku dala barak iha ofendida nia kabun, tuku dala lima iha ofendida nia hirus matan, tebe dala barak iha ofendida nia kelen parte loos no karuk, tebe dala rua iha ofendida nia kotuk laran. Depois arguidu tuku iha ofendida niaibun no soe sai hotu ofendida nia roupa haruka ofendida ba hela iha nia inan no aman nia uma.

Antes ne'e, maizumenus iha tinan 2021, arguidu tuku, basa no tebe iha ofendida nia isin loloon.

Prokuradór akuza arguidu kontra artigo 154 KP kona-ba maus-tratus ba kónjuje ho moldura penál tinan 2 to'o 6 prizaun konjuga ho artigo 2, 3 (a), 35 (a) LKVD.

Produsaun ba prova sira

Arguidu konfesa parsial ba faktu ne'ebé hakerek iha akuzasaun prokuradór nian, no deklara katak nia la soe ofendida nia rounpa iha liur no tuku tebe la liu dala tolu. Mezmu nune'e arguiu deklara katak arrepende ninia hahalok, arguidu ba ofendida nia uma atu husu deskulpa ba ofendida maibé ofendida lakohi hasoru arguidu no agora sira moris separadu ona.

Entretantu, ofendida kontinua konfirma faktu sira iha akuzasaun no deklara katak moris hamutuk ho arguidu sempre hetan bei-beik agresaun hosi arguidu maibé la ba hato'o keixa. Iha 2023 mak ofendida foin halo keixa no agora sira moris separadu ofendida hela ho nia inan aman lakohi moris hamutuk ona ho arguidu.

Alegasaun finál

Prokuradór haktuir katak arguidu konfesa parsial ba aktu ne'ebé mak nia halo hasoru ofendida, mezmu nune'e ofendida konfirma faktu hotu iha akuzasaun. Tanba ne'e prokuradór entende katak hahalok sira ne'e provadu hotu nune'e husu ba tribunál fó pena suspensaun ba arguidu.

Entretantu, defeza haktuir katak mezmu arguidu konfesa parsial ba faktu sira arguidu deklara arrepende ona nia hahalok nune'e husu ba tribunál fó pena adekuadu ba arguidu.

Desizaun

Depoisde avalia faktu sira ne'ebé produs durante julgamentu tribunál konsidera faktu hotu iha akuzasaun prokuradór nian provadu hotu katak arguidu halo tratamentu kruel hasoru ofendida nu'udar feen.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé agrava ka hatodan no atenua ka hakmaan arguidu, tribunál konklui prosesu ne'e no kondena arguidu ho pena prizaun tinan rua suspende ba tinan rua.

27. Krime ofensa ba integridade física simples ho natureza VD

Nú. Prosesu	: 0024/25. BCBCV
Juisa	: Dra. Maria Solana da C. Fernandes
Prokuradór	: Dr. Ambrosio Rangel Freitas
Defeza	: Dra. Agostinha de Oliveira
Desizaun	: Pena multa US\$60.00

Iha 30 Jullu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu JAA hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 09 Feveireiru 2025, iha oras tuku 19:00 kalan, arguidu buti ofendida nia kakorok, silu liman klaran parte loos, buti liman kabun parte loos no karuk. Arguidu nia aktu ne'e rezulta ofendida sofre moras no bubu iha fatin atinzidu. Antes ne'e, arguidu ho kondisaun lanu toba hela mak ofendida fakar bee ba iha arguidu nia leten.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD

Produsaun ba prova sira

Iha prosesu julgamentu, arguidu deklara katak faktu no motivasaun problema iha akuzasaun ne'e loos, depoisde akontesementu liu semana ida sira di'ak malu ona. Arguidu deklara katak nia arrepende nia hahalok no durante moris hamutuk foin primeiravés halo agresaun hasoru ofendida. Arguidu hatutan katak depoisde akontese arguidu la baku ona ofendida no serbisu nu'udar badaen ho rendimentu la fixu.

Prokuradór husu ba tribunál atu presinde ofendida ninia deklarasaun, tanba arguidu konfesa integralmente ba faktu hotu iha akuzasaun, nune'e faktu sufisiénte ona. Nune'e mós defeza laiha opozisaun ruma tanba ne'e tribunál presindi hodi la rona ofendida nia deklarasaun.

Alegasaun finál

Prokuradór haktuir katak akuzasaun prokuradór nian provadu bazeia ba konfisaun arguidu nian. Prokuradór argumenta katak ema ne'ebé arguidu baku ne'e arguidu nia feen rasik ne'ebé tuir loloos arguidu mak proteze ofendida hanesan feen/membru família maibé arguidu mak halo fali agresaun hasoru ofendida. Atu prevene arguidu nia aktu ne'e iha futuro, husu ba tribunál atu kondena arguidu ho pena multa US\$60.00 ho taxa diaria 0,50 sentavus.

Entretantu, defeza haktuir katak bazeia ba produsaun prova iha audénsia julgamentu hanesan, konfesa faktu, di'ak malu ona, arrepende nia hahalok no foin primeiravés mai hatan iha tribunál. Tanba ne'e husu ba tribunál fó pena multa ba arguidu tuir arguidu nia kapasidade finanseiru.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu bazeai ba konfisaun arguidu nian.

Relasiona ho faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

28. Krime aktu seksuál ho adolexente

Nú. Prosesu	: 0081/24.VQVQQ
Kompozisaun Tribunal	: Singulár
Juisa	: Dra. Albertina da Conceição das Neves
Prokuradór	: Dr. Julio da Silva Correia
Defeza	: Dr. Grigorio M. L. de Lima
Desizaun	: Pena prizaun tinan 3 suspende ba tinan 3

Iha 30 Jullu 2025, Tribunál Judisiál Primeira Instáncia Baukau, prezide leitura sentensa ba krime aktu seksuál ho adolexente ne'ebé envolve arguidu DdC hasoru ofendida ho idade tinan 14, iha Munisípiu Vikeke.

Akuzasaun Prokuradór

Prokuradór akuza katak iha 16 Outubru 2024, iha oras tuku 23:00 kalan, ofendida mesak iha uma, arguidu nu'udar ofendida nia doben telefone ba ofendida katak atu ba halimar iha ofendida nia uma. Nune'e ofendida aseita hafoin arguidu ba iha ofendida nia uma. Kuandu arguidu to'o iha uma diretamente tama ba ofendida nia kuartu laran, depois arguidu haruka ofendida kolu nia kalsa, arguidu toba sae iha ofendida nia leten hodi halo relasaun seksuál ho ofendida. Ofendida foin primeiravés halo relasaun seksuál nune'e rezulta moras no raan iha ofendida nia orgaun seksuál.

Prokuradór akuza arguidu kontra artigu 178 KP kona-ba aktu seksuál ho adolexente ho moldura penál to'o tinan 5.

Produsaun ba prova sira

Iha prosesu julgamentu, arguidu deklara katak sira halo duni relasaun seksuál tanba sira iha relasaun namora kuaze fulan ida. Arguidu hatutan katak sira halo relasaun seksuál dahuluk iha 14 Outubru 2024, fatin no oras hanesan, 16 Outubru 2024, sira halo relasaun daruak iha fatin no oras hanesan, iha 18 Outubru sira tula malu ho motor mak ofendida nia familia toman sira hodi ba apresenta iha Eskuadra Polísia Vikeke. Arguidu ho ofendida nafatin komunika malu liu hosi telefone hanesan namora.

Iha parte seluk, ofendida deklara katak sira iha relasaun namora kuaze fulan ida no halo relasaun seksuál dala ida deit iha 16 Outubru 2024, iha oras tuku 23:00 kalan, bainhira ofendida nia inan no aman la iha uma mak ofendida kontaktu arguidu hodi mai iha ofendida nia uma no kontinua halo relasaun seksuál.

Alegasaun finál

Prokuradór haktuir katak iha audénsia julgamentu arguidu konfesa sira halo relasaun seksual mezmua sira halo relasaun seksuál ho konsientementu, maibé lei mak la premite tanba ofendida nia idade. Arguidu nia aktu abuzu ofendida nia inesperensia seksuál no relatóriu médiku junta iha prosesu hatudu katak ofendida foin mak halo relasaun seksuál ho arguidu tanba ofendida nia himen nakles momentu arguidu halo relasaun seksuál ho ofendida. Tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza alega katak bazeia ba produsaun ba prova arguidu ho ofendida halo relasaun ho konsimementu liu hosi prosesu namora no arguidu ho ofendida rasik la iha kuñesementu kona-ba halo relasaun seksuál ho idade hanesan sira ne'e kontra lei ka lae. Arguidu konfesa, arrepende nia hahalok no foin primeiravés mai hatan iha tribunál. Tanba ne'e husu ba tribunal fó pena ne'ebé adekuadu ba arguidu.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu tuir konfisaun arguidu nian no ofendida nia konfirmasaun ba iha akuzasaun.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>